

IGREYIDI 3 ILIMI LEKHAYA

Idayari yomntwana otsitsilako



ISINDEBELE

Ileveli:

1

Incwadi

4



Ukufunda ngeenqhema okuhlahlwa ngutitjhere

Ngaphambi kokufunda

- Phendla uye ekhasini elinendatjana ezokufundwa. Khuluma ngeenthombe.
- Bawa abafundi bafunisele kobana indatjana imayelana nani ngokuthi bafunde isihloko bebaqale neenthombe.
- Yethula nanyana uhlathulule amagama alikhuni ngaphambi kobana abafundi bafunde indatjana.

Ukufunda kokuthoma

- Abafundi kumele bazifundele isiqetjhana ngokwabo.
- Abafundi kumele bafunde buthule nanyana bafundele phasi sakuhleba isiqetjhana soke.
- Khambakhamba hlangana nabafundi uqalisise kobana boke abafundi bayazibandakanya ekufundeni. Ungabawa kobana loyo umfundu oseduze kwakhe afundele phezulu indawana leyo efundwako.

Ukucocisana

- Buza imibuzo emayelana nalokho okufundiweko.
- Nqopho emagameni atjhejiweko, amatjhada nelwazi-magama.
- Uzokufunyana eminye yemisebenzi encwadini le ngemuva iqakathekile begodu ingahlahlah lokho ekungakhulunyiswana ngakho. (Khetha imisebenzi efaneleko nenembako eselevelini labafundi.)

Ukufunda kwesibili

- Ngamanye amalanga, ungavumela abafundi kobana babuyelete bafunde incwadi. Bangafunda ngamunye nanyana ngababili.
- Tjhejisisa ukufunda ngokutjhelela, ihlelo nelwazi-magama.
- Bawa abafundi baqedelele umsebenzi owenzwiwa ngeenqhema ekhona ngemuva kwencwadi le. (Khetha imisebenzi enembako esezingeni elifanele abafundi.)



Nangabe kunesithombe esinje,
abafundi abalingise indatjana leyo.



Ngemva kokuzifundela ngamunye, abafundi kumele bafunde ngeenqhema. Abafundi abasebenzisane ngeenqhema ukujedelela umsebenzi onembako ongemuva encwadini le. Abafundi akukameli batlole okuthileko phezu kwencwadi le. Umsebenzi otlolwako awutlolelwe ngeencwadini zabo zokutlolela umsebenzi.

Idayari yomntwana otsitsilako



Ngaphambi kokuba ngithome...

Ibizo lami njingu John Ntuli, kodwana abangani bami bangibiza ngo Mntwana otsitsilako.

Njengomntwana owaziwa iphasi loke "uWimpy", nami nginayo idayari yami begodu ngilinga ukutlola isiqetjhana qobe lilanga. Lokho kuyangisiza bonyana ngizazi bonyana ngenza ini qobe lilanga nokuthi ngidlula njani emirarweni engihlangabezana nayo.

Ekhaya ngihlala nomma nobaba, udadwethu nomfowethu omncani. UPam uneminyaka eli-12 begodu uthanda ukuthelisa abanye abentwana.


Umfowethu omncani uneminyaka emi-3 begodu ulelesa khulu.

Nginjani? Ngimfitjhani khulu kibo boke abangani bami begodu ngifaka amarhalasi wamehlo.

Ngesinye isikhathi lokho kungenza ngibe nemiraro ngombana abanye abentwana bacabanga bonyana angikahlakaniphi bebangirhuge, kodwana bathe nabathoma ukungazi, base bayangithanda.

Ngesinye isikhathi bayangihleka bangithathe njengomuntu ohlekisako. Nawufunda idayari yami, uzokubona lokhu engikutjhoko.

Nanyana ngjhlala elokitjhini, ngifunda isikolo edorobheni, kumasabhabhu. Nginabangani abanengi bayoyoke imihlobo, imibala nobukhulu. Sizithabisa kwamanikelela nasisoke. Umngani wami omkhulu nguJabu, uRobert, uJenny noShawn. Ngemsitheleni, mina ngizithandela uMary.



Inyanga: uSewula


NgoMvulo

Namhlanje bekulilanga lokuthoma lokuvulwa kweenkolo. Ngamatanga wokuphumula bezizinengi tle izinto ebe zisenzeka. (Bengikhambile ngiyokuvakatjha, ngithe ngiphezu kwepera, ngawa, bengingacabangi nokobana iinkolo zingavulwa.)




Bekumnandi esikolweni lokha nabe ngihlangana nabangani bami godu, uJabu, uRobert noShawn. Imiraro yami ithome phasi godu ngemva kokuphuma kwesikolo. Besidlala ibholo erarhwako, uNom. Jones, oyikhowutjhu, ungibawile bonyana ngiqale amapali ngaphambi kokurarha ngifake igondelo.

Ngithe nangithi mehlo suka, ngambona uMary ajame ngeqadi abukele. Angazi bonyana kwafika ini engqondweni yami. Ngabe ngirarha ibholo ngibambelele phasi ngezandla ngilinga ukumenza bonyana angibuke. Ibholo yakhamba yaya phezulu njengombana mina ngase ngiwe ngomdogodlho.



Ibholo iye phezulu njalo yase
iyabuya yazongibetha ebusweni.
Ngemva kwalokho ipumulo
yami yaba bomvu be ngeengazi.
Ngazibona njisidlhayela.
Ngathoma ngatsitsila ngingedwa.






NgeLesihlanu

Namhlanje bekungelinje ilanga lehlekelele. Kanengi umma uyangitjela bonyana ngingadudi emlanjeni.

Ilanga belitjhisa tle begodu mina no Robert saqunta ukududa ngemlanjeni. Sihlubule sabeka izambatho zethu phezu kwedwala ngaphandle komlambo sase siziphosela ngemanzini. Sidude kamnandi siphatjhaza amanzi, sitjhinga phasi siphuma ngemanzini. Sakhamba isikhathi bekwafika lapha besele kumele siphume khona ngemlanjeni.

Ilanga beliyokutjhinga lokha nasiphuma ngemanzini. Saqalaqala sele sifuna izambatho zethu. Do ukuzithole. Saqala mahlangothi woke womlambo, ngaphetjheya ngale, nanziya iimbuzi. Enye imbuzi idla izambatho zethu. Enye yeembuzi ngayibona igomojele ibhrugu lami. Sase siyazifihla-ke ukuze singabonakali kobana sibhunubhunu. Sagijimela ekhaya. Umma bekasingeke khulu wase unciphisa amanye wamalungelo enginawo. Evekeni le angikavunyelwa ukuphuma ngesango njiyokudlala nabangani bami. Nalapho njiyatsitsila angineliseki.



ngoMvulo

Nanamhlanje ngisatsitsila godu. Bekulilanga lethu lekhonsadi esikolweni. Mina bekumele ngidlale indima yokuba yipungutjha endatjaneni ethi, "Abentwana abalikhomba bembuzi". Ngithe lokha nangikhwela esiteji, ngase ngiyakukhohlwa koke lokho ebe njimele ngikukhulume. Imida ebengimele ngiyikhulume bengiyilungiselele pheze iimveke ezimbili zoke ezidlulileko. Bengingasakhumbuli negama elilodwa emideni leyo. Bengithuke kwamambala neenyawo zami bezihlengenezela.

Ngalinga ukuthi, "Bentwana ngivulelani, njimi umma wenu. Nginiphatheli ukudla okumnandi." Iphimbo lami larhohhlomela. Ngathomha ngangunguza. "Be-e-e Ntwa- a-na ... nji- uku-dla". Utitjhore wami bekalokhu angisiza njalo angithomela igama lokuthoma lomuda ebengimele ngiwutjho. Kodwana bengingakwazi ukukhuluma nangibona ababukeli ngibona namanye amalunga womndeni wakwethu. Bengithuke kwamanikelela. Ngemva kwesikhatjhana ngahlika esiteji ngabonakala njengesehluleki. Manikelela na? Ngivelelwa yini?




ngeLesibili

Namhlanje besitlola isihlahlubo sesiNgisi saka-ANA, iinhlahlubo ezitlolwa ilizwe loke eSewula Afrika.

Ngithe nangisafunda njalo, ngezwa umlomo wami womile. Bengithukile ngase ngikhupha ibhodlelo lami lejuzi kabuthaka ngalibeka phezu kwedeski.

Bengicabanga bonyana utitjhere angeke angibone. Ungibonile. Uthe nakangiqalako, ngase ngiphaya ibhodlelo lejuzi ngomkhono yaphalaka yathambisa nephepha leenhlahlubo. NelakaRobert iphepha lathamba.

Ngase ngisiwa e-ofisini lakahkokhulu bonyana adosele umma umtato. Ngizokuba semrarwenike godu. Iye, liqiniso angikathabi. Edinisweni mina ngihlala ngitsitsila njalo.



Inyanga: uSikinyikhaba


ngeLesithathu

Namhlanje ngikhambile ngayokutjhelela noShawn noRobert. Besiye ephageni lapha kutjhelelwa khona. UShawn noRobert bebeqa imibunjwana. Nami ngalinga ukweqa njengabo, kodwana ngavuka phasi. Ngabetha phasi ngobuso. Ngithe ngsazithintitha ithuli njalo, uPan, udadwethu oneminyaka eli-12 wangirhuwelela wathi umma uyangibiza ekhaya.

UPam wathatha umakarabha wami kungakadluli isikhathi esingangani besele atjhelela akhuphuka ubuphezulu obungaba siquntu sama-360 digri.

Kuza njani kobana abentazana baphumelele ezintweni ezinengi! Wakhamba atjhelela njalo sele sibuyela ekhaya mina ngimlandele ngemuva.


Umma naye bekalokhu arhuwelela athi kuze njani kobana ngiyokutjhelela ngingakathwali isikokoro. Bekangaboni bonyana umakarabha wami uthwelwe nguPam. Ngesinye isikhathi abantu abadala abazwisisi.




ngeLesihlanu

Namhlanje besifuna ukuyokudlala umdlalo wokutjhelela ngebhodi. Ngikhambile ngayokuqala ibhodi lami, akhange ngilifunyane. Umakarabha wami nawo bewungekho. Ngokunjalo-ke, uRobert noJabu bakhamba bodwa baya ephageni lapha kutjhelelwa khona. Ngemva kwesikhathi ngabalandela ngikhwele umlelenjana wami. Ngithe nangifika ephageni, ngabona uPan atjhelela ngebhodi lami begodu athwele nomakarbha wami. UPam bekatjhelela njengetkutani engusaziwako. UMary yena bekabukele. Bekamkwakwazelela uPam arhuwelela. "Wenza kuhle mntazana!" Ngemva kwesikhathi, uPam wazibuyisa iisetjenziswa zami zokutjhelela.

Kodwana bengingakazimiseli ukuzenza isidlhayela ngaphambi kwabentazana. Ngatsitsila ngingedwa, ngase ngiqunta ukuzinghalisa ngibuyelete ekhaya.





ndoSondo

Namhlanje bekumele siye kwagogo siyokudla
naye isidlo semini. Bengithabe khulu ukuhlangana
nabomzala nokubona abokghari bami abanengi.

'Maye! Qala kobana uJohn sele amsanyana omuhle
kangangani!"

"Uthi ukhulile na John? Sewumsana omkhulu tle!"

"Kwanje sele ufunda igreyidi yesi-3? Mhn! Qala
kobana ukhule kangangani?"

Ukghari uJane wase ungipha ijezi azilukele lona.
Bengisazi kobana uliluke alithanda, kodwana
bekanganasiqiniseko ngeminyaka yami.
Bekacabanga bonyana ngineminyaka emihlanu.

"Ngiyathokoza kghari. Bengifisa kangangani ukuba
nejezi lombala osarulani. Ngiyalithanda," ngatjho
ngephimbo elipholileko. Ngesinye isikhathiabantu
abadala abakwazi ukubona bonyana uyabakhohlisa.




Inyanga: uSikinyikhaba ngeLesihlanu

Izolo ebusuku bengilele kwabo laka Robert. Ngithe ngisayile ngobuthongo, u Robert wangivusa. Uthe uzwe itjhada lento evula ikhabethe wase ucabanga bonyana yirhorho. Besithukile sase sikhanyisa itotjhi siqala ngekhabethe ni. Sithe nasithi mehlo suka, sabona amehlo asarulani akhanyako. Kuthe kusese njalo, into yeqa yaphuma ngekhabethe ni. Sirhuwelele kwamanikelela. Yini kanti?

Bekungukatsu waka Robert. Ngemva kwalapho, ngaphilelwa.

Namhlanje ngiyende ngetlasini. Utitjhere uthe uzokudosela umma umtato ngombana acabanga kobana ngiyagula. Ngitjele utitjhere ngathi akhange ngilale kuhle ngayizolo. Kodwana waragela phambili wadosela umma umtato. Ngesinye isikhathi abantu abadala abazwisisi.



ngeLesibili

Mhlokho bekulilanga laka *titjh* here lamabeletho. Umma wanginikela amathuthumbo bonyana ngiwaphe *utitjh* here. 'Angizokukghona ukungena ngebhesini ngiphethe amathuthumbo mina," kwacabanga uJohn. "Abanye abontanga bazokuthini." "Vele abanye bacabanga bonyana njisidlhadlha. Nango nomma angikatelela bonyana ngithwale amathuthumbo. Awa-ke!" Ngithe nanginqophe esitopeni sebhesi, ngase ngiyawathatha ngiwafaka ngesikhwameni seencwadi ukuze abangani bami bangazokwazi ukungihleka. Ngaba ngewokuthoma ukungena ngetlasini ngaphambi kobana isimbi ilile. Akekho owangibonako.

"Yetjhe Kkz. Songo begodu langa elihle lamabeletho. (Bengicabanga kobana akekho ozongibona nangizokunikela isipho sakho.) Ngase ngikhupha amathuthumbo ngesikhwanyeni sami sele atjhwabene begodu agobene. 'Ngiyathokoza msana wami," kwa *tjh* here. "Ngiyawathanda amathuthumbo. Mhn! Qala bonyana anuka kamnandi kangangani!"

Ngacabanga ngejezi lami elisarulani. Konje nabantu abadala bayakwazi ukuzenzisa.



Umsebenzi owenziwa ngeenqhemba



1

Buyelela ucocele ohlezi eqadi kwakho indatjana engehla.

- a. Uyini umehluko hlangana kwedayari nencwadi yeendatjana?
- b. Ingabe nawe unayo idayari? Kubayini unayo/unganayo?
- c. Tjela ohlezi eqadi kwakho kobana uyithandile nanyana awukayithandi incwadi engehla le? Sekela ipendulo yakho.
- d. Ukhe waba nemiraro eminye efana patsi nale uJohn atlolle ngayo kudayari yakhe?
- e. Nangabe ukhe waba nayo, tjela ohlezi eqadi kwakho nokobana yakwenza wazizwa njani.
- f. Ucabanga kobana eminye yemiraro engehla, uJohn bekangayibalekela njani?
- g. Kungani ucabange kobana incwadi le inikelwe isihloko esithi "Umsana otsitsilako".
- h. Kungani uJohn acabanga kobana "abantu abadala abazwisisi"?



2

Buyelela ufundisise indatjana bese
ufunyana amagama anehlathululo
efana patsi neyala angenzasi:

engqondweni

ukubuka

ukuthuluka



3

Fundela ohlezi eqadi kwakho imitjho
elandelako bese uyibeka ilamane
ngendlela efaneleko.

- UJohn wazenza isidlhadlha lokha nakararha ibholo afuna ukukara uMary.
- Ijuzi yaka John yaphalakela phezu kweencwadi zeenhlahlubo.
- UJohn wathatha amathuthumbo awanikelwe ngunina wawafaka ngesikhwameni seencwadi.
- UJohn nomngani wakhe bebaduda ngemlanjeni lokha iiimbuzi zizakudla amabhruGU wabo.



4

Zenzele idayari bese utlola isenzo esithabisako owakhe waba naso.

Tlolela idayari leyo ngencwadini yakho yokutlolela umsebenzi. Khumbula ukutlola idadamu/ilanga, inyanga nomnyaka isehlakalo esenzeka ngaso.

Ilanga:

Inyanga nomnyaka:



5

Khetha amagama amahlanu alandelako bese utlole ngawo imitjho ozozitlamela yona utjengise kobana uyawazwisia.

ukuphilelwa	ukuyenda	irhorho
umbundu	ukutsitsila	ukukhwela
ukukara	abontanga	ukugomojela

IGREYIDI 3 ILIMI LEKHAYA



Incwadi 4

Isihloko:	Idayari yomntwana otsitsilako
Ilimi:	IsiNdebele
Ileveli:	IGreyidi 3 Incwadi yokufunda ngeLimi Lekhaya Ileveli 1 Incwadi 4
Umhlobo womtlolo:	Idayari
Amagama atjhejweko:	nanyana, ngaphambi, njalo, enye, ngombana, ngaphambi, eqinisweni
Ilwazi-magama:	ukwesaba, ukwethuka, ihlekelele, ababukeli, ukuhlangana, ukwelelesa, ukubuka
Amatjhada:	Igama elilodwa elitlolwa ngendlela efanako kodwana elineenhathululo ezahlukeneko: ilanga; inyanga, ukuthelisa, iinkolo, ukuphilelwa
Okumumethweko, imibono namakghono:	<ul style="list-style-type: none">▪ Uyini umehluko hlangana kwedayari nendatjana.▪ Uyithandile idayari yomsana otsitsilako? Sekela ipendulo yakho.▪ Buyelela ufundisise idayari bewuphendule imibuzo.▪ Hlathulula okutjhiwo magama anikelweko.▪ Lamanisa izehlakalo ngendlela enembako.▪ Zitlolele yakho idayari.

IsiTatimende seKharikhyulamu yeliZweloke (i-TKZ) sifuna kobana abotijhere babekel ngeqadi isikhathi qobe lilanga baqale umsebenzi wokufunda ohlahlwa ngutitjhere.

Ukufunda okuhlahlwa ngutitjhere kufuna abafundi abafunda ngezinga lokutjhelela elifanako kobana bafunde isiqetjhana esifanako, ngeenqhema begodu ngaphasi kwelawulo laka tijhere.

Utijhere kufanele ahlele iinkhathi zokufunda sekufaka hlangana namagama athileko azokuhlathululwa esiqetjhaneni kanye namaqhinga anembako wokufunda azokuthlhogwa bafundi. Elinye iqhinga elitlhogekako ngelokukhulumma ngesiqetjhana hlangana kwabafundi notitjhere begodu hlangana kwabafundi babodwa ngeenqhema.

Iincwadi lezi zifaka hlangana iinquetjhana ezinengi ekungakhulunywa ngazo. iinquetjhana ekungasuselwa kizo imibuzo kanye neminye imisebenzi engakusiza wena titjhere ukuze ukwazi ukuhlahlha abafundi bakho.

ISBN 978-1-4315-2426-6



ISBN 978-1-4315-2426-6



**THIS BOOK MAY NOT
BE SOLD.**



basic education

Department:
Basic Education
REPUBLIC OF SOUTH AFRICA

Published by the Department of Basic Education
222 Struben Street, Pretoria
South Africa

© Department of Basic Education
First edition 2016

The Department of Basic Education has made every effort to trace copyright holders but if any have been inadvertently overlooked, the Department will be pleased to make the necessary arrangements at the first opportunity.

Ezinye iincwadi zeGreyidi
3 ezisematjhelfini ngeLimi
Lekhaya:



URobby umqasa onamaqhinga udlelezela ipungutjha

Ikhambo eliyingozi elwandle

Siyazithabisa ngekhwitjhini

Idayari yomntwana otsitsilako



Ukubaleka okwaba yipumelelo

UTHandi ube nelanga elimbi

Ipelaveke engekhe sayikhohlwa



Kunerhorho ngekhabeteni lami

Icala lamakhekhe alahlekileko

Kuyamangaza, kodwana liqiniso